

Қош келдің, Ұлу жылы!



ЗАН газеті

✉ zangazet@mail.ru

№98 (3629) 29 желтоқсан 2023



ZANMEDIA.KZ

Қоғамдық-саяси, құқықтық газет

БҮГІНГІНІҢ БАС ТАҚЫРЫБЫ

ЗАҢЫ МЫҚТЫ ЕЛДІҢ ДАМУЫ ТЕЗ



Заң мықты болса – халық қауіпсіз, мемлекеттің дамуы тез. Себебі, құқықтық сауаты жоғары ел заңның дайындалуына атүсті қарамайды, биліктің босаңсуына, өз құқығының тапталуына жол бермейді. Биыл азаматтық қоғамның белсенділігінің артып, заңдардың айлар бойы қызу талқыланып жатқаны жиі байқалды. Басқаны айтпағанда, «Масс медиа» туралы заң жобасы Парламент Мәжілісіндегі жұмыс тобының 16 отырысында талқыланса, одан бөлек 6 рет қоғамдық талқылаудың тақырыбы осы заңға арналған екен.

(Соңы 3-бетте)

МІНБЕР

Жүйелі түрде жүргізіліп жатқан сот реформасы азаматтардың құқықтары мен бостандықтарының, заңды мүдделерінің әділ қорғалуын қамтамасыз ету, сол арқылы елімізде заң үстемдігін орнату мақсатын көздейді. Қоштасқалы отырған 2023 жыл да соттар үшін іргелі бастамалар мен игі қадамдардан кенде болмады. Солардың бастыларына тоқталып өтер болсақ, қоян жылының ең басты жаңалығын Конституциялық Соттың құрылуымен байланыстыруға болады.

КОНСТИТУЦИЯЛЫҚ СОТ – ЖЫЛДЫҢ БАСТЫ ЖАҢАЛЫҒЫ

Биыл ел тұрғындары өздерінің құқықтары мен бостандықтарының қорғауда Ата Заңға қайшы келетін нормаларға шағымдарын Конституциялық Сотқа тікелей беру мүмкіндігіне ие болды. Мұндай құқық Бас прокурор мен адам құқықтары жөніндегі уәкілге де берілді. Өтініштерді қарау тәртібі жалпы соттардағы іс жүргізу тәртібінен түбегейлі ерекшеленетін Конституциялық Сотты халық құқықтық мемлекет құру жолындағы маңызды қадамға санады. 2023 жыл сала қызметкерлері үшін қызмет сапасын жандандыруға бағытталған стратегиялық және операциялық менеджменттің жаңа моделінің енгізілуімен маңызды болмақ. Өйткені, жыл басында Соттардың қызметін

қамтамасыз ету департаментінің орнына Сот әкімшілігі құрылып, ол айрықша мәртебеге ие болды. Айрықша деп отырғанымыз, Сот әкімшілігі атауын өзгертіп қана қойған жоқ, оның дәрежесі Үкімет пен Парламент аппараттарының деңгейімен теңесті.

Біздің қоғам үшін бала болашағы қашанда басты орында. Сондықтан, сот саласындағы тағы бір тарихи бастама, яғни, «Қазақстан Республикасының кейбір заңнамалық актілеріне процесстік заңнаманы жетілдіру және сот жүйесін реформалау мәселелері бойынша өзгерістер мен толықтырулар енгізу туралы» заңын толықтырумен байланысты жүзеге асты.

(Соңы 4-бетте)

СӘТІ ТҮСКЕН СҰХБАТ

Әзімхан САТЫБАЛДИН, э.ғ.д., профессор, ҚР ҰҒА академигі:

«ӘЛЕУМЕТТІК ЖАҒДАЙДАН МОРАЛЬДЫҚ АХУАЛ МАҢЫЗДЫ»

– Әзімхан Әбілқайырұлы, экономика саласындағы биылғы басты оқиғалар деп нені атау едіңіз?

– Шынын айту керек, 2023 жыл оңай болған жоқ қой. Былтырғы Қаңтар оқиғасынан кейін экономика күрт төмендегенін білесіздер. Инфляция 18 пайызға дейін шарықтап кетті. Биыл Үкіметтің мәлімдемесі бойынша инфляция 2 есе азайып, 10 пайызға түсті. Сондай-ақ, жалақы мен шәкіртақы көлемі ұлғайды. Мәселен, мұғалімдердің жалақысы 500-600 мың теңгеге, докторанттардың стипендиясы 200 мың теңгеге дейін барады. Ғылым және жоғары білім министрі Саясат Нұрбектің сөзіне қарағанда, алдағы уақытта докторанттардың стипендиясы 500 мыңға дейін жеткізіледі. Бұл ҚазҰУ профессорының айлығы. Осы уақытқа дейін ғылымның жағдайы төмендеп кеткен еді. Мынандай қолдау ғылымға үлкен серпіліс береді.

Бұрын ауыл шаруашылығында жаңа сорттарды, жаңа тұқымдарды шығаратынбыз. Егетін егіннің 50 пайызы өзіміздің сорттар болатын. Қазір оның бәрінен айырылды. Тіпті, үлесі қанша болғанын да айта алмаймын. Биыл көршілес Ресей 150 млн тонна бидай жинап алды. Олар әлдеқашан гендік селекцияға өтіп кетті. Біз оған әлі жете алмай отырмыз. Сондықтан жинаған астығымыз 10 млн-нан сәл ғана асты. Қазақстан кем дегенде 20 млн тонна жинауы керек еді.

– 2024 жылға болжамыңыз қандай? Халықтың әлеуметтік тұрмысы жақсара ма?

– Мен бір нәрседен қорқып отырмын. Әлеуметтік жағдайдан гөрі, моральдық ахуалымыз маңызды. Ол өкінішке қарай күннен-күнге төмендеп барады. Неғұрлым айлық көтеріліп, жастарға жағдай жасалған сайын моральдық ахуалымыз төмендеуде.

(Соңы 5-бетте)

ЛЕБІЗ

ҚҰРМЕТТІ ӘРІШТЕСТЕР!

**Судьялар одағының атынан
Сіздерді келе жатқан 2024 жыл-
мен құттықтаймын!**

Өткен жыл сот жүйесі және Судьялар одағы үшін сот жүйесін әрі қарай жаңғырту бойынша табысты жыл болды.

Ел Президенті Қасым-Жомарт Тоқаев 2023 жылғы наурыз айында «Қазақстан Республикасының сот жүйесі мен судьяларының мәртебесі туралы» Қазақстан Республикасының Конституциялық заңына өзгерістер мен толықтырулар енгізу туралы» ҚР Конституциялық заңына қол қойды. Онда судьялардың тәуелсіздігін нығайту, атап айтқанда, аудандық соттардың төрағаларын сайлаудың жаңа тетігін енгізу бойынша шаралар көзделді.

Әкімшілік әділет саласын кеңейту, ювеналды соттардың соттылығын ұлғайту, тұтас кассацияның балама моделін енгізу, судьялардың жүктеме-лерін теңестіру және азаматтар үшін әділеттілікке қолжетімділікті жеңілдету мақсатында қалалардағы бірінші инстанциядағы соттарды біріктіру жөнінде нақты қадамдар жасалды.

Осы және өзге де жаңалықтардың барлығы сот жүйесінің басты мәселесін шешуге бағытталған жол – бұл жаңалықтар сот төрелігін жүзеге асырудың жоғары сапасын қамтамасыз етеді. Өткен жыл Судьялар одағы үшін де жемісті болды. Қоғамдық бірлестік құқықты дамытудың ең өзекті тақырыптары, сот өндірісін жетілдіру жөніндегі практикалық шараларды талқылау бойынша форумдар мен конференциялар ұйымдастыру ісіне бастамашылық етті.

Халықаралық ұйымдар сарапшыларының қатысуымен, заңгерлер қауымдастығы мен судьялардың кеңесі, шетелдік озық тәжірибе, қолдану практикасына тыңғылықты талдау жасау негізінде қолданыстағы Судья әдебі кодексіне ауқымды сараптама жүргізу жалғасып жатыр. Бұл – сот жүйесіне деген сенімді арттыруға, қоғамның сұранысына, заманауи талаптар мен сын-тегеуріндерге жауап беретін судьялардың кәсіби іс-әрекеттерінің стандарттарын анықтауға мүмкіндік береді.

Судьялар одағының филиалдарына, судьяларға және жұмыс топтарының мүшелеріне барлық бастамаларға қолдау танытқаны, белсенді ұстанымдары үшін алғыс айтамын!

Алға қойған жоспар көп, дегенмен түпкі меже – өз өмірімізді арнаған істің игілігі үшін кәсіби қауымдастығымыздың бірлігін нығайту. Ортақ жұмысымыз – кәсіби қуаныш, іскерлік абырой сыйласын, ең бастысы – біз халықтың сенімін ақтайық!

Баршаңызға денсаулық, шадыман шаттық және бақ-береке тілейміз!

**Сәкен АБДОЛЛА,
Қазақстан Республикасы
Судьялар одағының төрағасы**

